

# LIBRI I PROFETIT NAHUM

**1** Ky libër përmban fjalë profetike për Ninaven, kryeqytetin e perandorisë asiriane. Në të është shkruar ajo që Perëndia i tregoi Nahumit, një njeriu nga fshati Elkosh, për fatin e Ninaves.

## Besimi në fuqinë shpëtuese të Zotit

<sup>2</sup>Zoti është Perëndi që kërkon dëgjuesë, pa rezerva dhe pa kundërshtime. Kush ngre krye kundër tij, provon tërë zemërimin e tij. Kush i kundërvihet atij si armik, pëson goditjen e hakmarrjes së tij të fortë. <sup>3</sup>Zoti ka durim dhe pret, por nuk lë pa ndëshkuar asnjë padrejtësi; atij nuk i mungon fuqia për të ndëshkuar! Ai thërret në tërbimin e furtunës: retë janë pluhuri i ngritur nga këmbët e tij. <sup>4</sup>Ai i bërtet ashpër detit dhe ky thahet, lumenjtë shterojnë; kullotat e harlisura të Bashanit fishken; pemët në Karmel thahen dhe madhështia e luleve në Liban venitet.

<sup>5</sup>Malet dridhen para tij, dhe kodrat tunden; toka thërret nga tmerri dhe bashkë me të, të gjithë banorët e saj. <sup>6</sup>Kush mund të qëndrojë kur ai bën gjyqin? Zemërimi i tij derdhet si lumë i zjarrtë dhe çan edhe shkëmbinjtë më të fuqishëm.

<sup>7</sup>Por për të tjtë Zoti është plot mirësi, strehim i sigurt nga çdo rrezik. Ai kujdeset për ata që kërkojnë mbrojtje tek ai, <sup>8</sup>edhe kur ujërat kanosen me dallgë të furishme. Qytetin që ngre krye kundër tij, e rrafshon me tokën, ndërsa armiqtë e tij i dëbon në errësirën e botës së të vdekurve.

<sup>9</sup>Pse nuk keni besim tek Zoti? Ai do t'i godasë armiqtë me aq vrull, saqë nuk do të ngrihen më për t'ju shtypur. <sup>10</sup>Ata mund të mblidhen si ferra që gërshetohen me njëra-tjetrën, dhe mund të marrin zemër sa të duan, por zjarri do t'i përpijë si kashtë të thatë.

## Pushteti i asirianëve do të thyhet përfundimisht

<sup>11</sup>Njeriu që ngriti krye kundër Zotit dhe hartoi plane për rrënimin tënd, o Jerusalem, duhej të largohej prej teje. <sup>12</sup>Dhe tani Zoti thotë: «Edhe në qoftë se armiqtë e tu kthehen me forca më të mëdha dhe të armatosur mirë, do t'u ndodhë po ashtu: prej tyre nuk do të mbetet asgjë. Ju kam hedhur në hall dhe në dëshpërim, por nuk do ta bëj përsëri. <sup>13</sup>Do t'ju çliroj nga zgjedha e huaj dhe do t'jua heq barrën, nën të cilën rënkoni.»

<sup>14</sup>Ndërsa mbretit armik Zoti i thotë: «Varri yt është tashmë i përgatitur; për mua ti nuk ekziston më. Familjen tënde do ta shuaj; shtatoret e idhujve në tempullin tënd do t'i thyej.»

## Vegim për rrënimin e Ninaves

**2** Tashmë lajmëtari shpejton nëpër malësi duke sjellë lajmin e fitores dhe duke thirrur paqen. Festojini përsëri festat tuaja, o banorët e Judës, mbajeni premtimin që i dhatë Zotit në kohën e rrezikut.

Armiku mizor nuk do ta sulmojë më kurrë vendin tuaj; ai është mundur plotësisht. <sup>2-3</sup>Armiqtë e kanë shkretuar vendin dhe ia kanë prerë hardhitë, por Zoti do t'ia rikthejë Izraelit madhështinë e tij të dikurshme.

O Ninave, tashmë po afrohet ai që po të përgatit rrënimin! Bëhu gati! «Të gjithë në pozicione! Lidhni shpatat! Vrojttoni rrugën!» <sup>4</sup>Po vjen armiku; mburojat dhe veshjet e luftëtarëve janë të lyera me të kuqe; karrocet e luftës dhe heshtat e vringëlluara ndriçojnë si zjarr. <sup>5</sup>Në rrugë dhe në sheshe karrocet e luftës po vërshojnë dhe kalojnë njëra-tjetrën – duken si pishtarë, si vetëtimë gjarpëruese.

<sup>6</sup>Në qytet mbreti mbledh të besuarit e tij; ata vrapojnë përpara. Armiku i sullet murit; tashmë po ngre çatinë mbrojtëse për dashin. <sup>7</sup>Portat për në lumë hapen befasi; banorët e pallatit mbretëror i kap paniku.

<sup>8</sup>Mbretin e mbërthejnë në shtyllën e turpër; mbretëreshës i grisin rrobat e trupit, dhe e largojnë; shërbëtorët e saj qajnë me dënesë si pëllumbat që gugurojnë, dhe i bien me dëshpërim gjoksit. <sup>9</sup>Të gjithë largohen nga Ninaveja, siç zhduket uji nga pellgu, kur ai boshatiset. «Rrini, rrini!» – u thërrasin nga pas, por askush nuk kthehet. <sup>10</sup>Plaçkitni, merrni, ju pushtues! Merrni arin dhe argjendin! Qyteti është i mbushur plot me gjëra madhështore, me thesare të çmueshme. <sup>11</sup>Kudo që të hedhësh vështrimin, shkatërrim dhe shkretim, zemra të lëshuara dhe gjunjë të dridhur, trupa të përpëlitur nga dhembja dhe fytyra të zbehta.

<sup>12-13</sup>O Ninave, ti ke qenë si shpellë luani, si skuta ku tërhiqet luani dhe ku ushqen këlyshët që rriten atje të qetë. Luani doli për të plaçkitur, solli pre për këlyshat e tij, pre për luaneshat e tij. Ai mbushi çdo qoshe të shpellës së tij me pre. Ku është tani shpella e luanëve?

<sup>14</sup>«Tani ke të bësh me mua, o Ninave! – thotë Zoti i gjithëfuqishëm. – Unë do të të djeg bashkë me gjithë madhështinë tënde, dhe të rinjtë e tu do t'i grijë shpata. Plaçka e marrë tek ti do të largohet nga vendi, nuk do të dërgosh kurrë më lajmëtarë për të treguar për madhështinë dhe fuqinë tënde.»

## Dënimi për Ninaven e ngarkuar me faj

**3** Mjerë qyteti që derdhi kaq shumë gjak, që është mjeshtër i gënjeshtreve dhe i shtirjes! Ai është mbushur plot me mallra të plaçkitura, e megjithatë nuk mund të pushojë së vjedhuri. <sup>2</sup>Rrënimi i tij po afrohet me goditjen e kamxhikut, me rrapëllimën e rrotave, me kuajt që rendin, me karrocet që

vërshojnë <sup>3</sup>dhe me kalorësit që nxitojnë. Shpata si flakë dhe heshta si vetëtima! Grumbuj të rënësh në luftë, ushtarë që pengohen në kufoma të panumërta! <sup>4</sup>Ninaveja sulmohet, prostituta që i ka skllavëruar kombet me joshjen dhe magjinë e saj. <sup>5</sup>”Tani po i laj hesapet me të – thotë Zoti i gjithëfuqishëm. – Do të ta ngre rrobën lart në fytyrë, që të dalësh lakuriq para kombeve; <sup>6</sup>do të të mbuloj me baltë dhe të vë në shtyllën e turpit. <sup>7</sup>Të gjithë ata që do të të shohin, do të të kthejnë shpinën dhe do të thonë: «Ninaveja është e shkretuar! Kush do të vajtojë për këtë?» Askush nuk do të jetë i gatshëm për të të ngushëlluar.”

### **Fati i Ninaves është vulosur**

<sup>8</sup>A mendon se do të të ndodhë më mirë sa qytetit të Tebes ♦ që gjendet pranë Nilit, dhe që mbrohet përreth nga uji? <sup>9</sup>Egjiptianët dhe nubasit e panumërt e kishin mbrojtur, me njerëzit nga Puti dhe Libia si trupa të thirrur për ndihmë. <sup>10</sup>Megjithatë, banorët e tij u dëbuan në mërgim. Kryetarët e tij u vunë në pranga dhe u ndanë me short ndër fitimtarët, ndërsa fëmijët e tyre u shpartalluan në çdo qoshe rruge. <sup>11</sup>Edhe ti duhet ta pish kupën e zemërimit të Zotit dhe të dehesh; më kot do të përpiqesh të mbrohesh nga armiku.

<sup>12</sup>Fortifikatat e tua në kufi janë si pemë fiku, ndërsa garnizonet e tua si fiq; kur shkundet pema, fiqtë bien në gojë. <sup>13</sup>Burrat e fortë janë bërë frikacakë; vendi yt u dorëzohet pa mbrojtje armiqve; kështjellat u dorëzohen flakëve. <sup>14</sup>Ngrihuni, mbli dhni ujin si rezervë për kohën e rrethimit! Përforconi muret! Shkelni baltën dhe bëni tulla! <sup>15</sup>Por ato nuk do të të vlejné për asgjë, sepse do të të përpijë zjarri; banorët e tu do të bien nga shpata. Edhe në qoftë se ata ishin të panumërt si karkalecat – kur të ketë kaluar gjithçka, do të shihet se luzma të sulmoi ty!

<sup>16</sup>Tregtarët e tu janë më të shumtë se yjet në qiell, por ata do të zhduken papritur si karkaleci i porsadalë nga fshikëza: ai është nisur! <sup>17</sup>Nëpunësit e tu mbikëqyrës dhe protokollistët e tu do t’ia mbathin si luzma e karkalecave që e ka kaluar natën në mur; sapo del rrezja e parë e diellit, nisen; askush nuk e di ku kanë ikur.

<sup>18</sup>Ti, o mbret i Asirisë, ministrat e tu bëjnë gjumin e vdekjes, gjeneralët e tu shtrihen të mundur, luftëtarët e tu janë shpërndarë si kopeja pa bari në malësi. <sup>19</sup>Askush nuk mund të të vijë më në ndihmë; nuk do ta marrësh veten nga kjo goditje!

Kush dëgjon për fatkeqësinë tënde, do të duartrokitë nga gëzimi, sepse askush nuk ka mbetur pa e provuar mizorinë tënde.

♦ e pushtoi Ashurbanipali (Asiria) më 663 p.e.r.